



Foru Dekretu proiektua, interes orokorreko xedeen esparruan mezenasgoko lehentasunezko jarduerak 2024-2028 epealdirako ezartzen dituen.

Apirilaren 7ko 3/2004 Foru Arauak, irabazi asmorik gabeko entitateen zerga erregimenari eta mezenasgoaren aldeko zerga pizgarriei buruzkoak, mezenasgoari aplikagarri zaizkion zerga pizgarriak arautzen ditu III. tituluan.

Zehazki, titulu horretako IV. kapituluak jasotzen du zein zerga onura aplikatzen zaizkien lehentasuna aitortua duten jarduerari eta aparteko interes publikoa duten gertakarietan laguntzeko programei.

Lehentasunezko mezenasgo jarduerari dagokienez, aipatutako foru arauaren 29. artikulua xedatzen du Gipuzkoako Foru Aldundiak interes orokorreko xedeen esparruan lehentasunezkotzat jotzen diren mezenasgo jardueren zerrenda bat ezarri ahal izango duela ekitaldi bakoitzerako, entitate onuradunak zein diren eta jarduera horiek zer beharkizun eta baldintza bete behar dituzten ere zehaztuta: hori guztia artikulua horretan aurreikusita dauden zerga onurak aplikatze aldera.

"Lehentasunezko" deklaratzeko diren jarduera gehienek gero datozen ekitaldietan kalifikazio horrekin jarraitzeak komenigarri egiten du haien indarraldia luzatzea, Konstituzioaren 9.3 artikuluan jasotzen den segurtasun juridikoaren printzipioa bete eta Administrazio Publikoen Administrazio Prozedura Erkideari buruzko 39/2015 Legearen 129. artikuluan araututako lanari buruz aldarrikatzen den efizientzia lortzea ahalbidetzeko.

Gainera, mezenasgoko lehentasunezko jardueren zerrenda bost ekitalditan izateak egonkorra, posible egingo du ekarpenak egiten dituztenen konfiantza handitzea, epe luzeago baterako emango baitie ziurtasuna beren ekarpenen zerga araubideari dagokionez. Hori guztia ekarpen horietarako pizgarri eta dinamizatzaileri izatea espero da, haien zerga onurek horixe baitute azken helburu.

Aurrekoaz aparte, pertsona edo entitate onuradun batek garatzen duen jarduera edo programa jakin bat berriazko eran deklaratzeko "lehentasunezkotzat" urtebeteko indarraldia izango du, eta, beraz, deklarazio hori egiteko aurkeztu behar den eskaera eta jasotako ekarpenei buruz gero aurkeztu behar den memoria ekitaldi guztietan egin eta bidali beharko dira. Horrela, lehentasunezko jardueren zerrendari egonkortasuna emateak ez du berekin ekarriko gaur indarrean dagoen prozedura aldatzea.

Foru dekretu honen bitartez onartzen dira 2024-2028 epealdirako lehentasunezkotzat jotzen diren jarduerak, eta, halaber, zehazten da zer entitatek izan behar duten ekarpenen onuradunak, hala dagokienez, eta zer beharkizun eta baldintza bete behar diren jarduera horien garapenean.

Ohi den bezala, foru dekretu honek informazio obligazioak ezartzen ditu bai lehentasunezko jarduerak eta programak garatzeko ekarpenak jasotzen dituzten pertsona eta entitateentzat,



eta bai jarduketa esparru desberdinetako departamentu eskudunentzat, eta horren helburua da informazio horretatik ateratzen diren ondorioak euskarri bat izatea emakume eta gizonen arteko aukera berdintasuna sustatuko dituzten lehentasunezko jarduerak etorkizunean deklaratzeko.

Beharrezkoa da aipatzea ezen honako bi arau hauek onartzean, otsailaren 11ko 2/2019 Foru Araua, Gipuzkoako Lurralde Historikoan kultur mezenasgoaren aldeko zerga-pizgarriei buruzkoa, eta abenduaren 20ko 5/2022 Foru Araua, Gipuzkoako Lurralde Historikoan oinarritzko ikerketarako mezenasgoaren aldeko pizgarri fiskalei buruzkoa, mezenasgoaren beste eremu espezifiko batzuk irekitzen direla, berariazko pizgarriak ezartzen baitira foru arau horietan aurreikusitako jardura edo proiektuek jasotzen duten parte-hartze pribaturako.

2/2019 Foru Arauaren 18. artikuluan eta 5/2022 Foru Arauaren 14. artikuluan adierazten den bezala, bertan araututako onura fiskalak bateraezinak dira, zenbateko berberetarako, irabazi asmorik gabeko entitateen zerga erregimenari eta mezenasgoaren aldeko zerga pizgarriei buruzko apirilaren 7ko 3/2004 Foru Arauak jasotzen dituen onura fiskalekin.

Horiek horrela, Ogasun eta Finantza Departamentuko foru diputatuak proposaturik, Lege Aholkularitzako Batzordearekin bat etorriz, eta Diputatuen Kontseiluak gaurko bileran eztabaidatu eta onartu ondoren, honako hau

XEDATZEN DUT

1. artikulua. Xedea.

Foru dekretu honen xedea da ezartzea zeintzuk izango diren interes orokorreko xedeen esparruan lehentasunezko jarduerak 2024 eta 2028 urte bitarteko ekitaldietan, biak barne, eta, orobat, adieraztea zer entitate izango diren onuradunak eta zer beharkizun eta baldintza bete behar dituzten jardura horiek apirilaren 7ko 3/2004 Foru Arauak, irabazi asmorik gabeko entitateen zerga erregimenari eta mezenasgoaren aldeko zerga pizgarriei buruzkoak, 29. artikuluan xedatutakoaren ondorioetarako.

2. artikulua. Lehentasunezko jarduerak gizarte politiken esparruan.

1. Gizarte politiken arloan, lehentasunezkoztat jotzen dira Gipuzkoako Lurralde Historikoan egiten diren proiektuak eta jarduerak, honako helburu hauek dituztenak:

a) Desgaitasuna duten edo bazterketa arriskuan dauden pertsonen lan eta gizarte arloan gizarteratzea.

b) Pobrezia eta kalteberatasun egoeran dauden haurrei eta haien senideei zaintzak eta laguntza ematea.



c) Mendekotasun egoeran dauden pertsonei, desgaitasuna dutenei, osasun mentaleko arazoak dituzten pertsonei eta gizarte bazterketa egoeran edo arriskuan edo babes gabezia egoeran dauden pertsonei zuzendutako zainketak eta laguntzak ematea.

d) Familia kalteberei zaintzak eta laguntza ematea.

e) Zahartze aktiboa sustatzeko formulen aniztasuna lantzea.

f) Komunitatearen erantzukizuna eskatzea gizarte arloko behar berriei erantzun ahal izateko.

g) Gizarte zerbitzuen, arlo sozio-sanitarioaren eta zaintzaren tokiko ekosistemen arloko gaiei buruzko ikerkuntza eta berrikuntza.

2. Aurreko 1. apartatuan jasotako jardueri dagokienez, irabazi asmorik gabeko entitate guztiak izan daitezke onuradun, betiere baldin eta Gipuzkoan jarduten badute lurralde horretako herritarren alde.

3. artikulua. Lehentasunezko jarduerak ingurumenaren esparruan.

Ingurumenaren esparruan, lehentasunezkoztat jotzen dira irabazi-asmorik gabeko entitateek elikagaiak alferrik ez galtzeko edo haien xahutzea murrizteko egiten dituzten programak edo jarduerak, horiekin hondakinen sorrera prebenitzen eta murrizten laguntzen dutenean.

4. artikulua. Lehentasunezko jarduerak kirolaren esparruan.

Kirolaren esparruan lehentasunezkoztat hartzen dira:

a) Gipuzkoako Foru Aldundiak 2024-2025, 2025-2026, 2026-2027, 2027-2028 eta 2028-2029 ikasturteetarako onesten dituen eskola kiroleko jarduera programetan ezarritako baldintzak eta beharkizunak betetzen dituzten kirol jarduerak.

b) Gipuzkoako kirol elkarte, selekzio eta kirolariek kirol txapelketetan parte hartzea, betiere beharkizun hauek betetzen badira:

a') Kirol lehiaketa ofiziala izatea, gizonezkoen 1. eta 2. mailako futbol lehiaketak izan ezik.

b') Estatuko bi kategoria gorenetakoa batean edo Europa edo mundu mailako txapelketa batean parte hartzea. Taldekako zenbait kirol modalitatetan, hirugarren kategoria aintzat hartu ahal izango da lehiaketaren lurralde eremua autonomia erkidegoaz gaindikoa denean.

Mendiko kirol modalitatean, lehentasunezkoak izango dira zortzi mila metrotik gorako gailurrak igotzea eta goi mailako eskaladak egitea.

Bertako kirol modalitateak direnean –tosta finkoko arraunketa, pilota, boloak eta toka eta herri kirolak-, lehiaketaren lurralde eremua kasuan kasuko ezaugarrien arabera erabakiko da.

Artikulu honetako b) letra honen ondorioetarako, Gipuzkoako kirolaritzat hartuko da Gipuzkoako kirol federazioren batean lizentzia federatua duen pertsona oro.

c) Honako baldintza hauek betetzen dituzten kirol jarduerak:

a') Parte-hartze esanguratsua izatea nazioartean. Baldintza hori ez da kontuan hartuko kirol modalitate autoktonoetan edo helburu nagusia kirol aisialdia duten gertaeretan, baldin eta, azken kasu horretan, mila kirolarik baino gehiagok parte hartzen badute, salbu eta parte-hartze horrek txikiagoa izan behar badu indarrean dagoen araudiak ezarritako segurtasun arrazoiengatik.

b') Jarduerak, zati batean behintzat, Gipuzkoan egitea.

d) Protagonistak emakumeak diren eta/edo emakumeen partaidetza bultzatzen duten kirol jarduera edo lehiaketak, edozein dela ere modalitatea, berariaz, genero estereotipoak haustea bultzatzen dutenak, edota emakumeen ikusgarritasuna eta aitorpen soziala sustatzen dutenak.

e) Desgaitasuna duten pertsonen zuzenduta dauden kirol egokituko edota kirol inklusiboko programak, betiere Gipuzkoan gauzatzen badira.

f) Irabazi asmorik gabeko entitateek garatutako programak, haien xedea Gipuzkoako Lurralde Historikoan goi errendimenduko kirol taldeak eta kirolariak finantzatzea denean.

5. artikulua. Lehentasunezko jarduerak kulturaren esparruan.

1. Kulturaren esparruan lehentasunezkoztat hartzen dira

a) Nazioarteko kultur proiektuen prestaketa. Halakotzat hartuko dira nazioarte mailako aitortza lortu duten sortzaile lokalen obrak ezagutarazteko egiten direnak, Espainiatik kanpo jarduten duten kultur erakundeek egiten dituztenak edo hainbat herrialdetako artistek parte hartuta antolatzen direnak.

b) Lurraldeko arte eszenikoen konpainiek sustatutako kultura zabaltzeko proiektuak, hurrei eta gazteei zuzendutakoak.

2. Inola ere lehentasunezko jarduera edo programaren deklarazioa ez da bateragarria izango gizarte onurakoak direla eta kultur mezenasgoa merezi dutela irizten zaien proiektu edo jarduerekin, Gipuzkoako Lurralde Historikoan kultur mezenasgoaren aldeko zerga pizgarriak arautzen dituen otsailaren 11ko 2/2019 Foru Arauak jasotakoaren arabera. Azken kasu horretan, aipatutako foru arauan jasotakoa izango da aplikagarri.

6. artikulua. Lehentasunezko jarduerak nazioarteko lankidetzaren esparruan.

Nazioarteko lankidetzaren esparruan, lehentasunezkoztat jotzen dira Gipuzkoan bertan edo Gipuzkoatik bertatik eginak izanik helburu hauek dituzten programak eta jarduerak:

- a) Giza eskubideak defendatzea.
- b) Maila ekonomiko, sozial edo politikoan genero berdintasuna defendatu eta sustatzea.
- c) Ingurumenaren jasangarritasuna defendatzea, baliabideen erabilera arrazionalarekin eta etorkizuneko belaunaldien bizitzarekin bateragarriak diren bizitzeko moduak ere barne.

7. artikulua. Lehenetsunezko jarduerak euskararen esparruan.

1. Honako jarduerak izango dira lehenetsunezkoak euskararen esparruan:

- a) Euskararen erabilera soziala sustatzeko programa eta jarduerak.
- b) Informazioaren eta komunikazioaren teknologiak erabiliaz, edukiak euskaraz hedatzeko proiektuak.
- c) Herri edo eskualde mailako euskarazko hedabideak.
- d) Euskararen erabilera arlo sozioekonomikoan sustatzeko jarduerak eta ekintzak.
- e) Euskarazko ahozko ondarea berreskuratu, babestu eta hedatzeko jarduerak.

2. Aurreko apartatuan adierazitako jarduera edo proiektuetako bat zein batzuk egiten dituzten guztiak izan daitezke entitate onuradunak, baldin eta Gipuzkoako Foru Aldundiko Hizkuntza Berdintasuneko Zuzendaritza Nagusiak 2024-2028 epealdian kudeatutako programen konturako diru laguntzak jasotzeko beharkizunak betetzen badituzte.

8. artikulua. Lehenetsunezko jarduerak sustapen ekonomikoaren eta berrikuntzaren esparruan.

1. Honako jarduera hauek izango dira lehenetsunezkoak sustapen ekonomikoaren eta berrikuntzaren esparruan:

a) Arlo hauetan ikerketa eta esperientazio lana garatzen edo ahalbidetzen duten jarduerak: nanozientziak, nanoteknologiak, mikroteknologiak, fabrikazio aurreratuko ikerketa jarduerak, adimen artifiziala, genomika eta proteomika, bioteknologia, neurozientziak, arlo biosanitarioa, energia berriztagarriak, erregai-pilak, zibersegurtasuna, pertsonen zahartzea, elektromugikortasuna eta gastronomiaren digitalizazioa.

Eremu honen barruan sartuko dira ikerketa lerro eta proiektuak eta teknologikoki bereziak diren azpiegitura eta ekipamendu berrietan egindako inbertsioa, ikerketa lerro berriak zabaltzea ahalbidetzen dutenean.

Era berean, lehenetsunezkoztat joko dira zientzia munduaren ardura eremuetan emakumeen presentzia balorizatu eta bultzatzea helburu duten jarduerak, zeregin hori betetzen denean neskatoak eta gazteak mundu zientifikora hurbiltzen lagunduko duten



ekimenak garatuz, edo emakumeak buru dituzten ikerketa taldeei zuzendutako bekak, coaching edo laguntza programak bultzatuz.

b) Enpresen ekintzailatza eta nazioarteko lankidetzak sustatzeko programak eta jarduerak, Gipuzkoako Lurralde Historikoko irabazi asmorik gabeko entitate pribatuek edo Gipuzkoako lurraldearen garapen ekonomikoa sustatzen duten zuzenbide publikoko korporazioek eginak direnean.

c) Bizitza osoko ikaskuntza sustatzeko jarduerak, hasierako prestakuntza arautua (hezkuntza agintari eskudunek finantzatua), okupazionala eta jarraitua integratzen duten entitateek garatzen dutenean.

d) Euskal Herriko Unibertsitatearen «Zientziaren, Teknologiaren eta Berrikuntzaren astea».

e) «Ekonomia berdea»ren estrategian bildutako ekimenak, esparru hauetako bat hartzen dutenean:

- Diseinu ekologikoa.

- Ekonomia funtzionala.

- Berrerabilpena.

- Konponketa.

- Birfabrikazioa.

- Birziklapena.

- Ekologia industrial.

f) Gipuzkoan terapia aurreratuak eta konputazio kuantikoa azkarrago ezartzea helburu duten jarduerak.

g) Inbertsio-industriaren kultura sustatzeko jarduerak, tokiko enpresa-sarea garatzeko palanka gisa, hezkuntza eta ikerketa-jarduerak garatuz eta/edo babestuz, bai eta ezagutza zabalduz ere, hitzaldi, mintegi eta argitalpenen bidez.

h) Genero aniztasuna sustatzea eta emakumeak erabakiak hartzeko organoetan sartzea helburu duten jarduerak, lurraldearen garapen ekonomiko eta soziala bultzatzeko beharrezko elementu gisa.

2. 1. apartatuko a) letraren jardueraren bat edo batzuk beren helburuen artean dituzten entitate guztiak izan daitezke onuradunak. Nahitaezkoa da jarduera horiek Gipuzkoan egitea, eta entitateak lurralde horretan kokatuta egotea.



Zehazki, entitateek Zientzia, Teknologia eta Berrikuntzarako Euskal Sareko agenteak izan behar dute. Ospitaleek egindako ikerkuntza jarduerak ere barruan sartu daitezke, haien helburua 1. apartatuaren a) letran jasotakoen artean badago.

Esparru honen barruan sartuko dira ikerkuntza lerro eta proiektuak.

3. Lehentasunezko jarduera edo programaren deklarazioa ez da inola ere bateragarria izango Gipuzkoako Lurralde Historikoan oinarritzko ikerketarako mezenasgoaren aldeko pizgarri fiskalak arautzen dituen abenduaren 20ko 5/2022 Foru Arauaren aplikazio eremuko proiektu edo jarduerekin; azken kasu horretan, foru arau horretan aurreikusitakoa aplikatuko da.

9. artikulua. Lehentasunezko jarduerak suteen prebentzio esparruan.

Suteen prebentzio esparruan lehentasunezkoztat hartzen dira Gipuzkoako Lurralde Historikoan suteen aurkako lanaren arloan trebatzea eta prestatzea xede duten irabazi asmorik gabeko entitate pribatuek garatutako jarduerak eta programak.

10. artikulua. Doako zerbitzu prestazioei onurarik ez aplikatzea.

Apirilaren 7ko 3/2004 Foru Arauak, irabazi asmorik gabeko entitateen zerga erregimenari eta mezenasgoaren aldeko zerga pizgarriei buruzkoak, 29. artikuluan ezartzen dituen zerga onurak ez dira aplikagarriak izango pertsona fisikoen errentaren gaineko zergaren zergadunek, sozietateen gaineko zergaren zergadunek edo ez-egoiliarren errentaren gaineko zergaren zergadunek aurreko 2tik 9ra bitarteko artikuluetan adierazitako esparruetako edozeinetan doan egin dituzten zerbitzu prestazioetan.

11. artikulua. Ondasun entregan balioaren zehaztapena diruzkoak ez direnean.

Lehentasunezkoztat hartutako jarduerak edo programak garatzeko diruz egiten ez diren ondasunen entregak baloratze aldera, jarraituko zaio apirilaren 7ko 3/2004 Foru Arauak, irabazi asmorik gabeko entitateen zerga erregimenari eta mezenasgoaren aldeko zerga-pizgarriei buruzkoak, 20. artikuluan jasotakoari.

12. artikulua. Zerga onurak aplikatzeko mugak.

Apirilaren 7ko 3/2004 Foru Arauak, irabazi asmorik gabeko entitateen zerga erregimenari eta mezenasgoaren aldeko zerga-pizgarriei buruzkoak, 29. artikuluan jasotako zerga onurak bakarrik aplikatu ahal izango zaizkie batera hartuta dena delako programa edo jarduera garatu edo exekutatzeko behar diren inbertsioen eta gastuen batura gainditzen ez duten ekarpenei.

Muga hori gaindituz gero, zerga onura ekarpen zaharrenei aplikatuko zaie.

13. artikulua. Lehentasunezko jardueraren berariazko izendapena.



1. Foru dekretu honetako 2tik 9ra bitarteko artikuluetan aipatutako jarduera edo programetako bat edo batzuk egiten dituzten pertsona edo entitate guztiek, jarduera edo programa garatzen duten ekitaldi bakoitzeko abenduaren 1a baino lehen, jarduera edo programa hori lehentasunezkoen artean sartzeko eskaera idatzia aurkeztu beharko dute, berariaz hala izenda dadin. Jarduketa esparruaren arabera Gipuzkoako Foru Aldundian eskudun den departamentuari aurkeztuko zaio eskaera hori

2. Eskaera horrekin batera, lehentasunezko izaera eskatzen zaion jarduera edo programaren deskribapenari buruzko memoria bat aurkeztu beharko da, bai eta inbertsio, gastu eta sarreraren aurrekontu bat.

3. Lehentasunezko jardueraren berariazko izendapenak urtebeteko indarraldia izango du.

14. artikulua. 182 eredua aurkezteko betebeharra.

Irabazi asmorik gabeko entitateen zerga erregimenari eta mezenasgoaren aldeko zerga-pizgarriei buruzko apirilaren 7ko 3/2004 Foru Arauaren 29. artikuluko 4. apartatuan eta Irabazi asmorik gabeko entitateen zerga erregimena eta mezenasgoaren aldeko pizgarriak aplikatzeko Erregelamendua onartzen duen azaroaren 2ko 87/2004 Foru Dekretuaren 8. artikuluan aurreikusitako betebeharrak formalak alde batera utzi gabe, nahitaezkoa izango da ekarpenen onuradunek honako eredua aurkeztea: 182 eredua —Pertsona fisikoen errentaren gaineko zerga, sozietateen gaineko zerga eta ez-egoiliarren errentaren gaineko zerga. Emariak, dohaintzak, doako zerbitzu prestazioak eta bestelako ekarpenak. Urteko laburpen informatiboa—.

15. artikulua. Garatutako jarduera edo programen genero eraginari buruzko informazioa.

2024-2028 epealdian lehentasunezko izendatzen eta garatzen diren jarduera edo programa guztietan, haien garapenerako ekarpenak jasotzen dituzten pertsonak eta entitateek informazio hau adierazi beharko dute irabazi asmorik gabeko entitateen zerga erregimena eta mezenasgoaren aldeko zerga pizgarriak aplikatzeko Erregelamendua onartzen duen azaroaren 2ko 87/2004 Foru Dekretuaren 8. artikuluko 1. apartatuaren arabera ekitaldi bakoitzari buruz aurkeztu behar den memorian: garatutako jarduera edo programaren genero eraginari buruzko informazioa, eta jarduera edo programa horrek genero estereotipoak ezabatze eta emakumeen eta gizonen arteko aukera berdintasuna sustatzeko helburuak bete izanari buruzkoa.

Horretarako, memorian informazio hau sartuko da bereziki:

a) Datuak sexuaren arabera bereizita.

b) Jarduerak edo programak pertsona juridikoek egiten dituztenean, gobernu organoen osaerari buruzko informazioa.

c) Jarduerak edo programak zein kolektibori dauden zuzenduta, eta haien bidez zein helburu lortu nahi diren.



16. artikulua. Elkarrekikotasuna lehentasunezko jardueren deklarazioan.

Apirilaren 7ko 3/2004 Foru Arauak, irabazi asmorik gabeko entitateen zerga erregimenari eta mezenasgoaren aldeko zerga pizgarriei buruzkoak, 31. artikuluan xedatzen duenez, foru arau horren 29. artikuluan aurreikusten diren zerga onurak estatuko eta beste foru lurraldeetako organo eskudunek lehentasunezkoztat jotzen dituzten jardueri eta programei ere aplikatuko zaizkie, baldin eta, haiek onartua duten araudian beste hainbeste egiten bada Gipuzkoako Foru Aldundiak onartutako jarduera eta programekin.

Xedapen gehigarri bakarra.

1. Lehentasunezko izendatutako jarduerak edo programak garatzen dituzten pertsona eta entitateek beren memorietan eman behar duten informazioan oinarrituta, gaian eskumena duen departamentuak txosten bat egingo du garatutako jarduera edo programaren genero eraginari buruz, eta, hala badagokio, txostenean hizpide izango du, baita ere, zer neurritan betetzen dituen jarduera edo programa horrek genero estereotipoak ezabatzeke eta emakume eta gizonen arteko aukera berdintasuna sustatzeko helburuak. Horretarako, Gipuzkoako Foru Aldundiko Emakumeen eta Gizonen Berdintasunerako Organoaren aholkularitza jasoko du.

2. Txosten hori Ogasun eta Finantza Departamentura bidaliko da, ekitaldi bakoitza amaitu eta hurrengo hiruhilekoan.

Azken xedapen bakarra. Indarrean jartzea eta ondorioak.

Foru dekretu hau Gipuzkoako Aldizkari Ofizialean argitaratu eta biharamunean jarriko da indarrean, eta 2024ko urtarrilaren 1etik aurrera sortuko ditu ondorioak.